

ŠTA TREBATE ZNATI PRIJE NEGO SE PRIJAVITE NA ERASMUS MOBILNOST?

- **Obavezno pročitati**

Poziv:

Služba za međunarodnu saradnju Univerziteta u Sarajevu objavljuje Erasmus+ pozive za prijavu na mobilnost naših studenata, nastavnog i nenastavnog osoblja Univerziteta u Sarajevu u toku akademske godine. Pozivi su otvoreni za one inostrane partnerske institucije čiji su sporazumi potpisani na nivou univerziteta. Za druge inostrane institucije čiji su sporazumi potpisani na nivou članica Univerziteta u Sarajevu je potrebno da se obratite nadležnom prodekanu/esi vaše matične članice za više informacija.

O programu:

Erasmus+ program omogućava međunarodnu razmjenu studenata, nastavnog i nenastavnog osoblja našeg univerziteta (UNSA) sa partnerskim visokoobrazovnim institucijama širom Evrope (lista inostranih institucija sa potpisanih sporazumom na nivou UNSA je dostupno na linku <https://www.unsa.ba/istrazivanje-i-saradnja/medunarodna-saradnja/erasmus/erasmus-ka171-partneri>). Ova prilika pruža vam šansu da se priključite globalnoj zajednici studenata i osoblja, istražite nove kulture i obogatite svoje akademsko iskustvo kroz međunarodnu mobilnost.

Ko se može prijaviti:

Na otvorene pozive koji su objavljeni na oficijelnim web stranicama našeg univerziteta (www.international.unsa.ba i www.unsa.ba/stipendije) mogu se prijaviti studenti i univerzitetsko osoblje UNSA, i to u sljedećem statusu:

Studenti:

- u trenutku prijave student mora biti upisan na jednu od članica UNSA (sa aktivnim statusom)
- mora biti minimalno druga godina prvog ciklusa studija
- mora imati minimalno 30 ostvarenih ECTS bodova
- mora biti nominovan od strane matične članice UNSA
- u trenutku implementacije mobilnosti mora biti upisan (u aktivnom statusu) na UNSA

Univerzitetsko osoblje:

- osoblje mora biti zaposleno na UNSA
- mora biti zaposleno u punom radnom vremenu na UNSA
- mora biti nominovan od strane matične članice UNSA

Detaljnije o uslovima ko se može prijaviti provjerite na linku: <https://www.unsa.ba/istrazivanje-i-saradnja/medunarodna-saradnja/mobilnost-studenata-i-osoblja>.

Trajanje mobilnosti:

Trajanje mobilnosti je definisano kroz Erasmus+ program i zavisi i od trajanja semestra na mnogim inostranim institucijama.

Studenti:

- trajanje 3 do 5 mjeseci (jedan semestar) je najčešći period koji je ponuđen konkursom. Neke institucije nude i period od jedne akademske godine, no to bude posebno naglašeno u konkursu. Maksimalno trajanje je 12 mjeseci po jednom ciklusu studija.

Univerzitetsko osoblje:

- najčešći period mobilnosti je 7 dana (5 radnih dana + 2 dana putovanja). Dani putovanja se ne smiju poklapati sa radnim danima mobilnosti.
- Neke institucije nude samo 6 dana (5 radnih dana + 1 dan za putovanje).

Finansijska podrška:

Erasmus+ program omogućava finansijsku podršku za mobilnost – stipendiju koja pokriva putne troškove, smještaj i životne troškove. Studenti mogu dobiti od 800 do 900 EUR mjesečno, zavisno od zemlje u koju idu + jednokratni iznosi za troškove puta. Univerzitetsko osoblje može dobiti od 140 do 180 EUR za iznos dnevnica, zavisno u koju zemlju putuju + jednokratni iznosi za troškove puta. Detaljnije informacije o Erasmus+ stipendiji možete naći na linku: <https://international.unsa.ba/sta-ukljucuje-erasmus-stipendija/>.

Kako se prijaviti?

Pročitajte konkurs, pažljivo pogledajte upute gdje se prijavljujete, ko se može prijaviti, studentsku ponudu, prijavne dokumente i rokove. **Obavezno pročitajte i napomene jer često inostrane institucije imaju posebne napomene kod prijavljivanja.**